

Uunga siunnersuut: Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaata allannguuteqartinnissaa pillugu Inatsisartut inatsisaat nr. xx, xx. xxxx 2016-imeersoq
(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Saqqummiussissut
(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Siullermeerneqarnera

Siunnersuummi siunertaavoq aallarnisaasut aamma suliffeqarfiit aallartermat aallarnisaasunik ineriartortitsinermik ingerlataqarnermik tapersiivigineqartarnissaasa periarfissinneqarnissaa, tassani aallarnisaasut suliffeqarfimminnik aallartitsinermut ineriartortitsinermullu atatillugu piffissami qaammatit 24-it tikillugit siunnersorneqarlutillu isumasioqateqarsinnaassallutik.

Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaanni nr. 20, 3. december 2012-imeersumi, kittaartakkatut, tunisassianik ineriartortitsinermut tapersiissutitut aamma inuussutissarsiutinut suliaasaqarfinnut immikkuullarissunut tunngasunut tapersiisarnertut ittumik aningaasaqarnikkut tapersiinnisaaq periarfissaqartinneqarpoq. Tapersiisarnermut aqqissuussat taakkua inuussutissarsiutinik ineriartortitsinermut annertoorujussuarmik pingaaruteqarput aammalu allannguutissatut siunnersuuteqarnermi ingerlaannassallutik, kisianni misilittakkat takutippaat aallarnisaasut aningaasaqarnikkut tapersiisarnernup saniatigut aallarnisarnernup siuariartortitsinerullu nalaanni siunnersorneqarnissamik isumasioqateqarnissamillu aamma pisariaqartitsinnaasartut.

Aallarnisaasunik ineriartortitsinermik ingerlataqarnermi peqataasut assersuutigalugu tuniniaanissamik nittarsaassinermut, inatsisinut aamma naatsorsuuserinermut il.il. tunngatillugu isumasioqateqarnissamik ilitserorneqarnissamillu periarfissinneqassapput. Tamatuma saniatigut aallarnisaasunik ineriartortitsinermik ingerlataqarnerup peqataasut aallarnisaasunik allanik taamaaqataanik inissisimasunik isumasioqateqarnissamik periarfississavai. Siunertaavoq aallarnisaasut aallartisarnermi kukkunernik nalinginnaasunik pisartunik aqquusaagaqarnissaasa pinngitsoortinnissaa, suliffeqarfiit aallartermat iluatsitsilluartartut amerlanerulersinnissaat aammalu aallarnisaasut akornanni

attaveqaqatigiilersitsinissaq, taamaalillutik imminnut ikioqatigiinnissamut
isumassarsiorfigeqatigiinnissamullu periarfissinneqassallutik.

Aallarnisaasunik ineriartortitsinermik ingerlataqarnermi siunnerfigineqarpoq, suliniutit
malunnaatilimmik siuariartortarnissaasa qulakkeerneqarnissaa aammalu inuiaqatigiinni
siuariartortitsinissaq.

Taamatut oqaaseqarlunga siunnersuut Inatsisartuni suliarineqassasoq inaassutigaa.